

Grondas sfidas per il rumantsch

DA JOHANNES FLURY,
PRESIDENT LIA RUMANTSCHA

■ **Pertge envidain nus vus 80 onns suenter la votaziun dal 1938, cura ch'il rumantsch è vegni declerà cun ina maioritad impressiunanta sco lingua naziunala? 80 onns n'è gea betg in eveniment-clav usità.** La smanatscha vers la diversitad linguistica, sco quai ch'ella è vegnida da lezzas uras d'ordaifer, n'exista, Dieu saja ludà, betg pli. Il rumantsch è però confruntà cun autras grondas sfidas:

1. Demografia ed economia da las vals alpinas

Il territoris tradiziunals da lingua rumantscha èn segnads dapi onns da la diminuziun da la populaziun. Scolas vengnan serradas u fusiunadas, piazzas d'emprendissadi svaneschan, piazzas da lavur van a perder. Ils giuvs èn sfurzads dad ir en ils centers per sa scolar e ston s'adattar linguisticamain. Territoris e vischnancas monolinguas rumantschas datti strusch pli.

2. Situaziun da las medias

Radio e televisiun han prestà bler per la chapientscha vicendaivla tranter las valadas ed ils idioms, medemamain las medias stampadas. Radio e televisiun èn periclitads tras l'iniziativa No-Billag, la sutletta gasetta quotidiana rumantscha per motivs economics.

3. Minoritads en in mund adina pli globalisà

Il territoris rumantschs na pon e na vulan betg s'isolar, els dattan mintg'onn alloschi a millis da giasts. L'Engiadin'Ota per exempel è gia dapi onns in territori quadriling: rumantsch, tudestg, talian ed englais coexistan. Per il rumantsch n'èsi betg simpel da defender qua sia posiziun.

4. Cuntradiziun tranter la tendenza d'unifitgar ed il scharm da la diversitad

Il rumantsch survegn ina gronda part da las simpatias, cun las qualas el po adina puspè quintar, gist pervia da sia particularitad, sia pitschnadad e sia colliaziun intensiva da lingua e cultura alpina.



Johannes Flury.

MAD

Nus na vulain oz betg simplamain laschar reviver il passà, mabain guardar enavant. Rumantsch e hightech s'accordan bain, quai han dacurt cumprovà students da la SPF/ETH e dal territori linguistic rumantsch, prototips èn avant

maun. Il medem vala per il rumantsch e las medias digitalas. Perquai lavurain nus per il mument intensivamain vi dad in model da medias che collia ils cuntegns digitals e las medias stampadas e che mussa uschia la midada en in nov mund da medias a l'exempel d'ina «pitschna» lingua.

Il princip territorial, pli baud considerà sco term impurtant per il rumantsch, è antiqù, en vista al fatg che almain in terz da la populaziun rumantscha viva ordaifer ils territoris tradiziunals. Dentant è la Svizra il territori da la quarta lingua naziunala e las fadias per mantegnair quella ston vegnir adattadas a questas circumstanzas. Betg mo il chantun Grischun è dumandà, mabain era la confederaziun.

Il sustegn da las medias, exemplaricamain tras la SRG SSR, è ina part. Dumandadas èn era las vischnancas e citads. En il chantun Basilea-Champagna ha il parlament fatg emprims pass. En las aglomeraziuns da l'entira Svizra ston esser pussaivel che uffants che creschan si rumantsch pon frequentar ina scola cor-

respondenta, tuttina sco uffants dad autras linguas. Ina purschida da lingua e cultura nativa exista per bleras linguas e culturas, pertge betg per rumantsch, il rumantsch è la fin finala ina lingua naziunala?

La Svizra è quai ch'ella è perquai ch'ella è in stadi quadriling. Monolinguitad privass ella da sia identitad. Il Rumantschs na vulan betg esser Supersvizzers, ma els èn tuttina in model per esser bilings. E quai funcziuna! E quai n'impedescha – cuntrari a quai che vegn pretendì mintgatant – tuttavia betg d'emprender ulteriuras linguas, il cuntrari!

Il 1938 è la decleraziun dal rumantsch sco lingua naziunala stà in confess d'ina Svizra independenta ed autonoma.

Il 1996 è quel vegnì rinforzà cun l'artitgel da linguas e la lescha da linguas correspundenta e vegnì mess en pratica cun mesiras concretas.

Il 2018 èsi in confess d'ina Svizra che na sa lascha betg reducir sin ina lingua, ina part dal pajais u ina cultura, mabain che vesa sia particularitad en la varietad.